



23. oktober 2013

**Immikkoortoq 709-711-mut tunngatillugu atugassarititaasussanut nalinginnaasunut september 2010-imeersunut tapiliusseq aamma sumiiffimmut Kalaallit Nunaata kujataani Kuannersuarni akuersissummut 2010/02-mut tapiliusseq nr. 1 pillugit nassuiaat.**

Ingerlatseqatigiiffik Greenland Minerals & Energy A/S Kalaallit Nunaata kujataata kitaani Kuannersuarni kisermaassisussaataalluni misissuinissamut akuersissummut 2010/02-mut (sionatigut 2005/28) misissuinissamik sivitsuinissamik 21. april 2010 akuerineqarpoq. Misissuinissamut akuersissut 2005/28 atugassarititaasut nalinginnaasut taamanikkut atuuttut tunngavigalugit tunniunneqarpoq. Akuersissummi aatsitassat atugassarititaasuni nalinginnaasuni immikkoortoq 1-imi allassimasut pineqartunut ilaapput. Taamaalilluni akuersissummi pinngoqqaatit qinngornernik ulorianartunik akoqartut pineqartunut ilaatinneqanngillat.

Greenland Minerals and Energy-p allakkani 9. august 2010-imeersuni ilisimatitsissutigaa, misissueqqissaarnermi uppernarsineqarsimasoq aatsitassat qaqutigoortut tamalikaartunik peqarfiusumiittut misissorneqartut, piiaanermut suliap ingerlanerani pinngoqqaatit qinngornernik ulorianartunik akoqartut ilaatinngit.

Taamaattumik Greenland Minerals and Energy-p peqarfimmut isumannaallisaanermut peqqinnissamullu apeqqutinut qularnaannerusumik ilisimasanik pissarsiniarnissamut akuerineqarnissaq kisaatigaa, ilanngullugit peqarfimmi pinngoqqaatit qinngornernik ulorianartunik akoqartut. Kingusinnerusukkat aatsitassanut ikummatissanullu inatsimmi aalajangersakkat malillugit piiaanissamut akuersissummik tunniussisinaanissamik qinnuteqaammut isummertoqartinnagu, avatangiisinut sunniutaasussanik nalilersuinerup (VVM) aamma inuiaqatigiinni piujuartussamik iluaqutaasumik sunniutaasussanik nalilersuinerup (VSB) sularisinaanannut qularnaannerusunik ilisimasanik peqarnissaq pisariaqarpoq.

Taamaattumik misissuinissamut akuersissutinut atugassarititaasunut nalinginnaasunut killissaliussat iluani misissuinerit suut akuerisaanersut killissaliussani erseqqinnerusumik erseqqissaanissaq pisariaqartinneqarpoq.

Apeqqutit tamanut atuuttut pineqarput, taamaallaat Kuannersuarni peqarfimmut tamalikaartunik akoqartumut attuumassuteqanngitsoq, kisiannili Kalaallit Nunaanni misissuinermut suliassanik allanik ineriartortitsinermut atatillugu atuuttut, taakkunannga Motzfeldt SØ aamma Sarfartoq misissuinermut akuerisaasunut killissaliussanik erseqqinnerusumik erseqqissaasoqanngippat unitsinneqarsinnaallutik.

Tamanna tunngavigalugu Naalakkersuisut 9. september 2010 misissuinissamut akuersissutinut atugassarititaasunut nalinginnaasunut immikkoortunik nutaanik 709-711-nik ilassuteqarnissaq akueraat.

*"709. Killissarititaasut immikkoortoq 101-mi taaneqartut iluanni tamakkiisumik pissarsiffiulluarsinnaasunik misissuinerup, avatangiisinut sunniutaasinnaasunik kiisalu inuiaqatigiinnit nammaneqarsinnaaneraniq nalilersuinertallip, suliarineqarnissaa siunertaralugu, aatsitassat misissoqqissaarneqarnissaannut atugassamik atortussiassat nalinginnaasumik radiup qinngornerinik akullit misissorneqarnissaannut qinnuteqaatinut AIP akuersissuteqarsinnaavoq. Piiariaatsimi, avatangiisitigut kiisalu isumannaallisaanertigut peqqinnissakkullu sunniutaasinnaasut, pinngoqqaatinut radiup qinngornerinik akoqarsinnaasunut attuumassuteqartut misissuineruq nalunaarusiornernilu taakkunani immikkut pingaartinneqassapput. Piffissami pilersaarutaasumik misissuinissat pillugit qinnuteqaat nassuiaatitaqassaaq, tassa immikkoortoq 710-mi allassimasoq naapertorlugu.*

*710. Immikkoortoq 709-mi misissuinissamut taaneqartumut akuersissut tunniunneqarnerminit ukioq ataaseq atuutissaaq. Piginnittussaataasup qinnuteqarneratigut piffissaq ukioq ataasiakkaarlugu sivitsorneqartarsinnaavoq, tassa immikkoortoq 1010-1002 naapertorlugu nalunaarusiamik, immikkoortoq 709 naapertorlugu immikkut ittumik misissukkat nassuarneqarnerannik imalimmik, AIP tigusaqarsimassappat, kiisalu akuersissuteqarnissamut piunnaasaqatit atuuttut allat malinneqarsimappata.*

*711. Immikkoortut 709-710 naapertorlugit akuersissut pinngoqqaatinik radiup qinngornerinik akullinnik misissuinissamut atuinissamullu akuerisaanerup nalunaarutigineqarnissaanut pisinnaatitsinngilaq.*

Nalinginnaasumik maleruagassani aalajangersakkat nutaat ilanngunneqartut kingunerisaannik, pinngoqqaatit qinngornerinik ulorianartunik akoqartut qaffasippallaaraluartut, ingerlatseqatigiiffik VVM-imik misissuinermik ingerlatitseqqinnissamut qinnuteqaateqarsinnaalerpoq.

Misissuinermut pisussanut pilersaarummik aalajangersimasumik akuersissuteqarnissaq 709-711-imi aalajangersakkat nutaat malillugit aatsaat qinnuteqarnikkut pisinnaassapput, pissutsit peqqissutsimut aarlerinaateqarsinnaaneraniq naliliisinnaanissamut attuumassuteqartut tamarmik ilanngunneqartussaallutik. Tassa imaappoq sumiiffimmi misissuiffiusussami qinngornerit annertussusaannik uuttortaanerit aammalu qinngornerit sunniinertut annerpaanut naliusunut killissaliussanut aalajangersakkanut akuerisaasunut naleqqiullugu suliniutinik pisinnaatitsissummik pigisaqartup peqqissutsimut aarlerinaataasunik akuerineqarsinnaasutut annertussuseqalersillugit annikillitsiniarluni ingerlanniagaannik nalilersuineq. Akuersissuteqarneq piffissamut ukioq ataasiakkaarlugu tunniunneqartassaaq.

Ingerlatseqatigiiffiup akuersissummik pissarsiniareernermini 709 – 711-imi atugassarititaasunut nalinginnaasunut ilanngunneqartut nutaat malillugit misissuineq ingerlateqqippaa.

2011-imi oktobarimi Naalakkersuisut Siulittaasuata aamma Inuussutissarsiornermut Aatsitassanullu Naalakkersuisup misissuinerup ingerlanera pillugu ilisimatitsissuteqarniarlutik ingerlatseqatigiiffimmut Greenland Minerals and Energy A/S-imut pisortaat ataatsimeeqatigaat.

Sumiiffimmi misissuineq peqarfiup 619 millioner tonsinik saffiugassartaqartup, aatsitassanik qaqutigootunik 6.6 millioner tonsinik, uran-oxid-imik 350 millioner pundinik aamma zinkimik 1,3 millioner tonsinik akoqartup paasinarsisinneqarneranik kinguneqarpoq. Ingerlatseqatigiiffiup tunisarsiornermut akuersissummik tamatuma kingorna tunniussisoqassappat, ukiumut aatsitassanik qaqutigootunik 43.000 tonsinik uran-oxid-imik tunisarsiornermik ilaqartumik tunisassiornissaq naatsorsuutigaa.

Taamanikkut ilisimasat malillugit uranimik aamma thorium-imik akoqarnera 340 ppm-imik uranimik aamma 1.000 ppm missaani thorium-imik annertussuseqarpoq. Tassa imaappoq maannakkut akuersaangilluinnarnermi annertussusiusunit annertuumik annertunerullutik.

Greenland Minerals and Energy-p Naalakkersuisut Siulittaasuannik aamma Inuussutissarsiornermut Aatsitassanullu Naalakkersuisumik ataatsimeeqateqarnermi ilisimatitsissutigaat, ingerlatseqatigiiffik aatsitassat qaqutigootut ilanngullugit peqarfimmi misissuisinnaasoq erseqqinnersumik oqaatigineqanngippat, ingerlatseqatigiiffik misissuinermut immaqalu kingusinnerusukkat annertusaanermut ingerlatanik ingerlatitseqqinnissamut naammattunik aningaasalersuutissanik pissarsisinnaanngitsoq.

Misissuinermut suliap ingerlaneranit ingerlateqqinneqarsinnaanissaata qulakkeerneqarnissaa siunertaralugu ingerlatat ingerlateqqissinnaanissaannut, VVM-ip, peqqissutsimut misissuinerit, VSB-ip aamma imminut akilersinnaassutsimut misissuinerit inaarsarneqarnissaannut aningaasalersuutissanik pissarsiniarnissamik ajornarunnaarsitsisussamik, pisinnaatitsissutip oqaasertaannut tapiliussaqaarnissaq oqaluuserineqarpoq.

Tamanna tunngavigalugu Naalakkersuisut ingerlatseqatigiiffiup pisinnaatitsissutaata oqaasertaannut imaattumik tapiliussaqaarnissaq akuersissuteqarfigaat:

*"Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-meersumi (aatsitassanut ikummatissanullu inatsit) §§ 16 aamma 29 naapertorlugit matumuuna Naalakkersuisut, Kalaallit Nunaata kujataani Kuannersuit eqqaanni sumiiffimmut misissuinissamut akuersissut nr. 2010/02-mut (akuersissut) allannguutissat makkua nalunaarutigaa:*

#### *1. Aatsitassat akuersissummi pineqartunut ilaasut*

*101. Akuersissummi aatsitassat atugassarititaasuni nalinginnaasuni immikkoortoq 101-imi allassimasut pineqartunut ilaapput. Aatsitassat tamarmik pineqarput, akuersissummi allamik allassimasoqarsimanngippat ikummatissiassat, pinngoqqaatit qinngornernik ulorianartunik akullit aamma isumalluutit erngup nukinganeersut pineqarnatik.*

*102. Misissuinissamut akuersissummi matumani piffissami akuersissuteqarfiusumi, akuersissummut pinngoqqaatit qinngornernik ulorianartunik akullit aamma pineqartunut*

ilaapput, taamaattorli takuuk immikkoortoq 201-202.

2. Pinngoqqaatinik qinngornernik ulorianartunik akulinnik pīaanissamut imaluunniit taakkununga pīaanissamut akuersissummik pissarsinissamik pisinnaatitaaffeqanngilaq

201. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamik pisinnaatitaaffeqanngilaq aammalu pīaaqqusaanani. Pisinnaatitsissummik pigisaqartoq aamma pinngoqqaatinik qinngornernik ulorianartunik akulinnik pīaanissamut tunngatillugu allanik pisinnaatitaaffeqanngilaq.

202. Pisinnaatitsissummik pigisaqartoq aamma pinngoqqaatinik qinngornernik ulorianartunik akulinnik pīaanissamut akuersissummik tunineqarnissamut pisinnaatitaaffeqanngilaq. Tamanna atuutissaaq pisinnaatitsissummik pigisaqartup pinngoqqaatinik qinngornernik ulorianartunik akulinnik niuerutigalugu pīarneqarsinnaasunik peqartoq paasinarsisissimagaluarpaguluunniit sumiissusersisimagaluarpagilluunniit aammalu allatigut atugassarititaasut misissuinissamut akuersissummi matumani allassimasut naammassisimagaluarpagilluunniit.

3. Pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik qinnuteqarneq

301. Pisinnaatitsissummik pigisaqartoq misissuinissamut akuersissut manna tunngavigalugu pīaanissamut akuersissummik tunineqarnissaminik qinnuteqaruni, takuuk atugassarititaasuni nalinginnaasuni immikkoortut 1401-1408, pisinnaatitsissummik pigisaqartoq aamma pīaanissamut akuersissut malillugu pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik qinnuteqarsinnaavoq.

302. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik qinnuteqarpat, takuuk immikkoortoq 301, Naalakkersuisut qinnuteqaat nammineerlutik aammalu arlaannik tunngaveqanngitsumik imaluunniit sumilluunniit tunngaveqanngitsumik itigartissinnaavaat. Qinnuteqaat ilaatigut politikkikkut imaluunniit ingerlatsivimmi pinngoqqaatinik qinngornernik ulorianartunik akulinnik pīaanissamut akuersissummik tunniussisanninnissamik aalajangiineq tunngavigalugu itigartinneqarsinnaavoq. Qinnuteqaammik itigartitsineq pīussaaffeqarnernik akisussaaffeqarnemillu malitseqassanngilaq, ilanngullugit Namminersortutik Oqartussanut, Naalakkersuisunut imaluunniit Aatsitassanut Ikummatissanullu Pisortaqarfimmut taarsiinissamik akisussaaffiliisanani.

303. Pisinnaatitsissummik pigisaqartoq pinngoqqaatinik qinngornernik ulorianartunik akulinnik pīaanissamut akuersissummik tunineqarnissamik qinnuteqarpat, tak. Immikkoortoq 301, Naalakkersuisut pinngoqqaatinik qinngornernik ulorianartunik akulinnik pīaanissamut atugassarititaasut suulluunniit namminneerlutik aammalu killilersuutitaqanngitsumik aalajangersarsinnaavaat. Naalakkersuisut ilaatigut pīaanermi ingerlatanut, isumannaallisaanermut, peqqinnissamut, avatangiisinut, pīussutitunik atorluaanermut aamma inuiaqatigiinni pīujuartussamik iluaqutaasumik sunniutaasussanut atugassarititaasussanik kiisalu pisinnaatitsissummik pigisaqartoq

Kalaallit Nunaanni Namminersorlutik Oqartussanut akiliuteqassanersoq aalajangersaasinnaapput. Naalakkersuisut tassunga ilanngullugu namminneerlutik aamma arlaatigulluunniit killilersuutitaqanngitsumik ukiumoortumik akitsuummik sumiiffiup akuersissummi pineqartumut ilaasup angissusaa tunngavigalugu naatsorsugaasumik akiliuteqarnissamik (nunaminertamut akitsuut) atugassarititaasussanik, akitsuummik aatsitassat piiarneqartut ilaalu ilanngullugit tunngavigalugit naatsorsorneqartumik akiliuteqarnissamik (tunisassiornermut akitsuut) atugassarititaasussanik imaluunniit suliaqarnermit akuersissummi pineqartunut ilaasumit aningaasatigut pissarsiat ilaannik Kalaallit Nunaanni Namminersorlutik Oqartussanut akiliuteqarnissamik (pissarsianit akitsuut) atugassarititaasussanik aalajangersaasinnaapput.

3034. Immikkoortuni 201-202-mi allamik aalajangersaasoqarsimanngippat immikkoortut 301-3023 atuutissanngillat. Immikkoortut 301-3023 pisinnaatitsissummik pigisaqartup pinngoqqaanik qinngornernik ulorianartunik akulinnik paaanissamut akuersissummik tunineqarnissaanik pisinnaatitaaffiliinngillat."

Tapiliussami ingerlatseqatigiiffik pinngoqqaatinik qinngornernik ulorianartunik akulinnik misissuinissamut pisinnaatitaalerpoq. Peqatigisaanik tapiliussami erseqqissarneqarpoq Naalakkersuisut paaanissamut akuersissummik tunniussiumanngissinnaatitaasut. Taamatut tunniussiumannginneq qanorluunniit tunngavilersuutitalimmik aalajangiunneqarsinnaavoq, ilanngullugit politikkikkut eqqarsaatigisassat. Ingerlatseqatigiiffiup tamatumunnga paasinnilluni nalunaarutigaa.

Tapiliussaq Naalakkersuisut atsiornersigut 3. april 2012 atuutilerpoq..

Inussiarnersumik inuulluaqqusillunga



Jens-Erik Kirkegaard